

REGIONAL NEWS

HEADLINES:-

1. Vawiin hi Mizoram Presbyterian Kohhran ni pawimawh Health Sunday & Hospital Sunday (Damdawi In Pathianni) a ni a. Mizoram Presbyterian Kohhran chuan Hospital Sunday hi kum 1928 atangin a hman a ni.
2. Vawiin July ni 6 hi Mizo Hmeichhe Insuihkhawm Pawl (MHIP) Day a ni a. MHIP General Headquarters President Pi Lalliani chuan Mizoram pawn leh chhunga MHIP member zawng zawng bakah Mizoram mipuite chu MHIP Day chibai a buk.
3. Nimina Zokhawthar bul, Tiau lui kama Khawmawi khua a inkahna avangin Mizoramah raltlan an awm belh zel.
4. Prime Minister Narendra Modi leh Argentina President Javier Milei te chuan Buenos Aires-ah ram pahnihte inkar chungchang an sawi dun.

<><><>

HEALTH SUNDAY & HOSPITAL SUNDAY

Vawiin hi Mizoram Presbyterian Kohhran ni pawimawh Health Sunday & Hospital Sunday (Damdawi In Pathianni) a ni a. Mizoram Presbyterian Kohhran chuan Hospital Sunday hi kum 1928 atangin a hman a ni, kum 1981 atangin July thla Pathianni hmasa ber hi Hospital Sunday atan hman a ni.

Synod Hospital chuan kum 2020 atanga kum 2025 inkarah damdawi in awm man pe thei lo damlo mi 3259 bill cheng nuai 729 sing 3 sang 9, 263 a peksak.

Synod Hospital thuchhuah tarlan danin, Health Sunday leh Hospital Sunday pualin Synod hospital chuan damdawi in awm man pe thei lo chhungkaw khawsak harsa te bill a peksak thin a, kum 2020 atanga kumin thlengin damlo 3259 pek sak tawh niin heng zingah hian damlo 2263 chu Presbyterian an ni a, damlo 996 chu Kohhran dang an ni.

Mizoram Presbytarian Kohhran chuan Health Sunday leh Hospital Sunday pual hian Synod Hospital-a damlo mi rethei leh harsa, damdawi ina awmna man pe thei lo leh pek tlak tur nei lote a peksak leh a ni.

Synod Hospital thuchhuah tarlan danin kumin June 30 thleng khan damlo mi 480 awm man ba an la awm an ti a, hei hi a vaiin cheng nuai 203 sing 5 sang 9,678 a ni.

Kum 2008-a Synod-in "Health Sunday leh Hospital Sunday hi Pathianni vawi khatah a ruala hman ni se" tia a rel angin kum 2010 atangin July Pathianni hmasa bera hman thin Health Sunday leh Hospital Sunday-ah hian chawhnu inkhawm hi Health Sunday pual, zan inkhawm hi Hospital Sunday pual a ni dawn a, zanah Hospital Sunday pualin thawhlawm lakkhawm a ni ang a, Hospital Charity Fund atan hman a ni ang.

<><><>

MHIP DAY

Vawiin July ni 6 hi Mizo Hmeichhe Insuihkhawm Pawl (MHIP) Day a ni a. MHIP General Headquarters President Pi Lalliani chuan Mizoram pawn leh chhunga MHIP member zawng zawng bakah Mizoram mipuite chu MHIP Day chibai a buk.

Pi Lalliani chuan, MHIP Day chu Pathianni a nih avangin a hman hun a inang lo tih a sawi a, an hman hun inang lo mah se, an theihna zawn hrang hrangah midang tana malsawmna ni turin a chah a. MHIP chu kohhran leh political party tih bik nei lo, kohhran leh party zawng zwng lenna a ni, a ti.

MHIP President chuan Mizo hmeichhia taksa pholang tak taka inchei a, social media a intarlang thinte leh, Mizo hmeichhia tihmualpho theihna tur internet a pholan a ni thin chu pawl a tih thu sawiin, an tu leh fate incheina kawnga uluk leh fimkhur a tulzia in zirtirna kawngah Nu ten tih tur paiwmawh tak an nei tih hriat a ngai, a ti. YouTuber ten hmeichhe mualpho theihna tur chi post an siam thin chu ti tawp nghal turin a ngen bawh a ni.

Pi Lalliani chuan, ram leh hnam khawtlang leh chhungkua a lo dam zel theih nan leh, hmasawmna a lo awm zel theih nan leh, a chhe lai siamthatu nih theih nan mite tana malsawmna thlentu ni zel thei turin mahni hmazawn theuhah inlungualna nen hmalam pan zel turin mipui a sawm bawh a ni.

Tun dinhmunah MHIP hian Sub-hqrs 10, Block-30, Joint-7 leh Branch 766 an nei a. Member hi nuai 3 chuang an awm mek bawh a ni. Kum 2023-2025 chhung atana kumpuan 'Dikna leh Rinawmna Chawinun' tih a nih angin Day lawmna-ah pawh hian he thupui hmang hian thu an sawi bawh a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BORDER TENSION ESCALATES

Chin National Defence Force (CNDF), Falam lam mite leh CDF - Chin Defence Force (Hualngo sipai) te inkap chuan nghawng a nei zel a, nimina Zokhawthar bul, Tiau lui kama Khawmawi khua a inkahna avang hian Mizoramah raltlan an awm belh zel.

Khawmawi atanga Zokhawthar a Raltlan hi nizan thleng khan mi 2523 an tling tawh a, an mahni Chhungte bel an ni tlang pui tih Zokhawthar police hnen ataanga thu dawn a niin belh tur neilo chu te chu Zokhawthar YMA Hall-ah an awm.

CDF mi leh sa, C.Lalnghakmawia, kum 37, Aizawl Chanmari west a Pi Khawmawii fapa, CNDF leh CDF inbeihnaa nimin chawhnu dar 3:00 vela thi chu a ruang CNDF ten hun engemaw chen lak an phal loh hnuah nizan khan Mizoram ah lakluh a ni tawh.

<><><>

4 LANE

Mizoram a 4-Lane kawngpui laih hna chak zawka a kal theihna turin nimin khan Environment & Forest Climate Change Secretary Pu H Lalengmawia hovin, Kolasib-a Circuit house Conference Hall-ah NHIDCL leh EF&CC Department hotute an thukhawm.

Thutkhawmna-ah hian Pu H.Lalengmawia Four lane kawngpui laih hna chak zawka a kal theih nan Department hrang hrang; a bik takin EF&CC, P&E leh District Administration te chuan thawhhona leh inhriatthiamna tha zawk an neih a pawimawh a ni, a ti a. An hmalakna a muan chhante hrechianga chak zawka kawng laih hna a kal theih nan thing kih ngai te, electric hrui leh ban sawn chungchang ah te pawh NHIDCL ,P&E leh Forest Department-te chu a tul anga hma la zui tura hriattir niin, hemi kawnga harsatna a awm a nih chuan a rang thei ang bera District Administrator hriattir turin kalkhawmte chu a hrilh nghal bawh.

Mizoram a Four-Lane kawngpui sial hna hi tunhnai khan Package 3 huamchhung Vairengte leh a chhehvel atangin hna tan a ni a. Amaherawhchu he kawngpuiin a paltlang tura thing leh maute senghawina kawngah harstana thenkhat a awm avangin, hnathawktute hmalakna a ti muang ni a hriat a ni a. Mizoram Chief Minister leh Commissioner ten chak taka hma lak a nih theih dan tur an lo sawi dun tawh bawh a ni.

<><><>

Prime Minister in Argentina

Prime Minister Narendra Modi leh Argentina President Javier Milei te chuan Buenos Aires-ah ram pahnihte inkar chungchang an sawi dun.

Hruaitu pahnihte hian thawh hona kalpui mek chu an thlir ho a, India leh Argentina thawh hona tihchangtlun dan tur an sawidun a, chung zingah chuan ram venhimna, lo neih, tuialthei, gas leh thil hrang hrang, ram pahnih mipui te inzawmna nghet zawk neih te a tel a ni.

Prime Minister hian ram 5 a tlawh mek zingah Argentina hi a tel a, India-in khawthlang lam ram te nena inzawmna tih chak a tumna a ni. Hruaitu pahnihte hi an inhmuh hnahnun ber chu nikum November khan a ni a, Brazil khawpui Rio de Janeiro-a G20 Summit neih zawh takah khan a ni. Ram hrang hrang a tlawh hma hian Prime Minister chuan Argentina chu Latin America-a economic partner pawimawh tak leh G20-a thawhpui tha tak a nih thu a lo sawi tawh a ni.

<><><>

BRICS

Prime Minister Narendra Modi chu tukin khan Brazil khawpui Rio De Generio a thleng. Ram panga a tlawh tur zing ami niin, a tlawh chhung hian BRICS Summit vawi 17-na a hmanpui dawn a ni. Summit neih chhung hian Prime Minister hian khawvel thil pawimawh hrang hrangah ngaihdan a thawh dawn a, chung zingah chuan khawvel rorelna siamthat, remna leh muanna, , artificial intelligence fimkhur taka hman, boruak tihfai chungchang, hriselna, economics leh sum dinhmun chungchang te a tel ang. Prime Minister hian Summit karah hian ram dang nena inbiakna hun eng emaw zat a neih a rinawm bawh.

<><><>